

Rapport annual 2018 Biblioteca populara Disentis/Mustér e contuorn

«Tgi che legia sa dapli», stat ei sil placat che nus havein schau squitschar per l'EX18. Quella parola ei il medem mument il motto pil team dalla Biblioteca populara Disentis/Mustér e contuorn. Igl ei nossa finamira da metter a disposiziun per giuven e vegl ina vasta purschida actuala da cudaschs ed outras medias. Igl onn 2018 havein nus cumprau 940 medias novas (cudaschs, cudaschs auditivs, DCs e DVDs) en la valeta da ca. 8'000 francs. Ultra da quellas medias analogas han nos abonnents era access alla biblioteca digitala dibiost.

Promoziun dalla lectura

Tier las incumbensas d'ina biblioteca s'auda ei denton buca mo dad empristar cudasch, mobein era dad animar e promover da leger. Per completar nossa purschida ella sparta dalla promoziun dalla lectura e far quella pli attractiva, ha nossa collaboratura Manuela Venzin frequentau differents cuors. Cun las experientschas fatgas leu sa ella ussa completar las introducziuns e visetas da classa. Aschia legra ei nus che nus havein era igl onn 2018 puspei astgau beneventar regularmein en nossa biblioteca numerosas classas da Mustér e Sedrun sco era ina gruppera dalla Casa Depuo. Dasperas han era occurrenzas per affons prescolars giu liug regularmein, sco p.ex. «Buchstart» e «Mats» cun raquintar historias e kino da cudaschs da maletgs. En quei connex lein nus engraziar alla Pro Juventute Cadi ch'ella ha era igl onn 2018 purschiu als affons dallas annadas 2014/15 in bon per in abonnement gratuit ellas bibliotecas dalla Cadi.

Occurrenzas

Il mars havein nus astgau beneventar en biblioteca la giuvna autura Cornelia Vinzens che ha legiu ord siu cudasch «Nus savevan da nuot auter». La prelecziun ei vegnida accumpagnada musicalmein da Fiona Cavegn. Tier in pign apero han ils numerus visitaders giu suenter la pusseivladad da brattar atgnas regurdientschas da temps vargai. Al «Di svizzer da preleger» havein nus evidau ad in'occurrenza da «Buchstart» per geniturs cun affons pigns. A caschun dil campiunadi mundial da ballapei la stad havein nus organisau per pigns e gronds fans da ballapei ina buorsa da brat da Panini. En collaboraziun cun la scola ha giu liug il november ina prelecziun dall'autura da cudasch per giuvenils Andrea Gerster pil scalem superieur. Pils affons da scoletta ei il Casperet staus sin viseta. La finiziun da quellas occurrenzas ha la finala il «Caffè d'avvent» fatg il december.

Team

Naven digl uost 2017 tochen igl avrel 2018 ha nossa collega Susanna Venzin frequentau il cuors fundamental dalla Cumionza da laver dallas bibliotecas svizras da lectura publica (CLP) alla Biblioteca cantunala a Cuera. Il matg ha ella astgau prender encunter il certificat dalla CLP.

Deplorablamein ei nossa menadra Christine Bischof vegnida malsavanaugh in onn. Madleina Caminada ha surpriu ad interim la substituziun. Igl atun 2018 ei Ulrike Lechmann vegnida eligida sco nova menadra.

Igl october 2018 havein nus astgau beneventar cun Petra Schmid ina nova collega. Ei fa plascher a nus da puspei haver ina representanta da Sedrun el team.

Il december ha nossa collega Madleina Caminada terminau siu engaschi. Duront 31 onns ha ella luvrau cun bia entusiassem per la biblioteca. Per sia grondiusa lavur engraziein nus ad ella da cor. Madleina Caminada ei stada responsabla pil ressort finanzas che vegn ussa surprius da Nadja Hosang.

<i>statistica</i>	2018	2017	2016
emprests	13'634	12'801	12'254
novas medias registradas	892	940	1'024
novas entradas	40	42	51

Engraziament

Alla fin lein nus engraziar alla vischnaunca purtadra da Mustér sco era allas vischnauncas vischinontas da Tujetsch, Medel e Sumvitg per lur sustegn finanzial.

In special engraziament s'auda a tut ils visitaders che nezegian nossa purschida e dattan veta a nossa biblioteca. Nus giavischein ad els ch'els fetschien l'experiéntscha: «Tgi che legia sa dapli».

Ulrike Lechmann / Susanna Venzin

Mustér, fevrer 2019